


TEZAUUR LITURGIC

29 IUNIE / 12 IULIE

**SLUJBA
SF. CUVIOS
PAISIE
EZNEPIDIS
DE LA SUROTI**



**MINEIUL PE IUNIE
MOSCOVA**



Месяца июня в 29-й день

Преподобного

Паисия Святогорца

На малей вечерни

На Господи, воззвах: стихиры, глас 4.

Подобен: Дал еси знамение:

Отче Паисие досточудне,/ знаменьями воистинну чудес твоих/ в последняя времена явился еси/ веси Фарасския древо многоплодное,/ родителей твоих похвала,/ столп воздержания,/ Афона и всея Церкви слава./ Темже верных собрания/ пении по долгу благохвалят житие твое.

Отче Паисие богоблаженне,/ града Коницы украшение,/ пламенную любовь от юности ко Господу имея,/ житии святых и преподобных отец назидался еси/ и, во благочестия наставники тех избрав,/ ученик верный и последователь твердый/ воздержания и постничества был еси.

Отче Паисие священне,/ помыслы лютаго
сопротивника отверг,/ чистейший молниезрачный
образ Христа/ в сердце твоём приял еси./ Темже,
безбожия помышления разгоняя,/ истины догматы и
богатство веры/ ныне концем земли проповедуеши.

Отче Паисие преподобне,/ вышнее Троицы
действие издетска стяжав,/ благодать пощения приял
еси/ и, любовь велию ко святым имея,/ младенческая
вся отвергъ еси,/ движа ко изумлению вся сродники и
домашния твоя,/ прообразуя тако, святе, путь жития
твоего.

Слава, глас 2:

Неустанныя подвиги твоя, богоносе Паисие,/ яко
ясныя образы подражания и спасения вси познахом:/
страстей бо всяческая востания победив,/ во времена
последняя яко солнце возшел еси/ на горе Афонстей и
во инех странах,/ просвещая твоими чудесы и
наставлении./ Темже в молитвах не престай,/ ума
нашего мрак греховный разгнати,/ да познаем вси
велию милость.

И ныне, Богородичен:

Все упование мое на Тя возлагаю,/ Мати Божия,/ сохрани мя под кровом Твоим.

На стиховне стихиры, глас 2.

Подобен: Дому Евфрафов:

Коница и Синай,/ и гора Афонская,/ ликуют и хвалятся/ божественною памятью твоею,/ отче Паисие.

Стих: Восхвалятся преподобнии во славе/ и возрадуются на ложах своих.

Гробу твоему честному,/ отче Паисие,/ с верою множества покланяются,/ надеющиеся прияти/ благодать твою, славне.

Стих: Воспойте Господу песнь нову,/ хваление Его в Церкви преподобных.

Ходатая ко Христу/ ведают тя вси,/ Паисие всеблаженне,/ темже и прошений своих/ приемлют исполнение.

Слава, глас тойже:

Имея в души, отче Паисие,/ свет Святыя Троицы,/ осияваеши благочестно/ призывающих тя, всеславне.

И ныне, Богородичен, глас тойже:

Владычице Богородице,/ молися непрестанно
Сыну Твоему/ о воспевающих рождество Твое,/
Богоневесто Пречистая.

Тропарь писан на велицей вечерни.

На велицей вечерни

На Господи, воззвах: стихиры на 8, глас 1.

Подобен: Всехвальнии мученицы:

От отрочества зело возлюбил еси/ монашеское
жительство/ и пребывание единомысленное,/
честный Паисие,/ темже мирская обольщения,/
плотския сласти и вся преходящая/ мужественне
презрел еси/ и, ум твой в Горняя вперив,/ яко ангел в
телеси пожил еси.

Воинства мирскаго ратник быв,/ преблаженне
Паисие,/ образ добродетели сущим с тобою показал
еси,/ иноческим же полком сочетався,/ учитель
благочестия многим явился еси,/ наставляя тех ко
спасению/ словесы твоими, знаменьями и чудесы,/
яже творил еси/ Христа божественною благодатию.

Возшед на гору Синайскую,/ тамо преподобно
пожил еси,/ подражая Моисею боговидцу/ и Иоанну,
лествицы божественныя писателю,/ славне Паисие,/
в посте, яко безплотен пожив,/ дарования Утешителя
Духа Святаго приял еси,/ якоже древле отцы наши и
вси святии.

Обители Стомион в Конице усердный инок/ и
Есфигмена благопокорный послушник был еси,/ и
Филофеевскую обитель, преподобне, прославил еси,/
последи же на гору Синай,/ яко ангел, вселился еси,/
промышляя о потребных людем бедным/ и о всякой
твари.

Поучении и чудеса многоразличными/ киновию
Суротийскую утвердил еси/ и благочестным девам и
женам,/ отче преподобне Паисие,/ воистинну
богосветлый наставник, путевождь и учитель явился
еси,/ темже гроб твой, якоже велие сокровище,/
священная обитель содержащи,/ веселится честне.

Юным мудрый попечитель явился еси,/ постниче
святый Паисие,/ недугующим врач и помощник,/
страстями губительными обдержимым избавитель,/

безбожным скорое вразумление,/ учеником
благонадежное утверждение/ и всякому человеку
ближний во Христе и знаемый.

Слава, глас 6:

Подвижников стезею шествуя,/ богоносе
Паисие,/ к добродетельному житию устремился еси/
и, ветхаго человека совлекая,/ непрестанною же
молитвою ум очистив,/ Духа Святаго сладости
причастник показался еси./ И ныне, богоукрашенный
отче,/ стяжанию благодати Духа Святаго/ нас
прилежно научаеши.

И ныне, Богородичен, глас тойже: Кто Тебе не
ублажит, Пресвятая Дево:

Прокимен дне. И чтения три преподобническая.

На литии стихиры самогласны, глас 1:

Веселися о Господе горо Афонская,/ в тебе бо, яко
цвет весенний,/ в последняя времена преподобный
Паисий процвете,/ иже слез изливанием,/ яко делатель
добрый, душу свою воздела,/ добродетелей древо
насади/ и плоды безстрастия и прозрения принесет,/
подаваяй страстей врачевание/ и исцеление недугов

душевных вкупе и телесных./ Темже ныне к нему
притекаем/ и с верою умильно вопием:/ молися,
святие Паисие, милостивому Богу за ны,/
воспевающих житие твое/ и велия твоя дарования.

Глас 2:

Своему хотению умертвився,/ яко иный Павел,
страстей свободился еси/ и одеждою световидною
Духа Утешителя облеклся еси./ Темже, яко телесныма
очима,/ помышления человеков зрети сподобился
еси,/ будущая предведая и полезная провещаая/
приступающим к тебе, отче Паисие./ Сего ради и мы,
руце к тебе простирающе,/ яко имущу велие
дерзновение ко Господу,/ молитися за ны просим,/
яко да волнение моря житейского преидем/ и в
пристанище Царствия Небесного достигнем.

Глас 3:

Отче преподобне,/ на всяк день человеков
множества,/ яко ковчег спасения,/ келлию твою
обступаху:/ едины убо спасения души взыскующе,/
друзии же исцеления недугов,/ помыслов
исправления/ и прилучшихся в житии разрешений

просяще./ Такожде и ныне ко гробу твоему,/ людие
притекающе,/ тогожде с верою просят,/ с нимиже и
мы тебе сице вопием:/ блаженне старче Паисие,/
молитвами твоими и нас укрепи.

Глас 4:

Море сланое страстей прешед/ и духов лукавых
гордыню низложив,/ вместилище Утешителя Духа был
еси,/ преподобне отче Паисие./ Ты бо, зеркало ума
очистив,/ моляся, Богочеловека Господа узрел еси,/
Пречистую Его Матерь,/ Лукиллиана и Евфимию,
мучеников славных/ и лики прочих святых./ С
нимиже и ныне молися Господу,/ помиловатися
душам нашим.

Слава, глас тойже:

Подражателя Христова, Паисия преподобнаго,/
на Святей Горе пожившаго,/ похвальными словесы
воспоим,/ той бо струями слез распаление страстей
угаси,/ душу просвети и ум очисти,/ и светлейший
сосуд благодати явился./ И ныне, собору постников
сочетався,/ непрестанно молится о призывающих
честное имя его.

И ныне, Богородичен, глас тойже:

От всяких бед рабы Твоя защиты,/
Благословенная Богородице,/ да Тя прославим,/
надежду душ наших.

На стиховне стихиры, глас 5.

Подобен: Радуйся, постников:

Радуйся, Фарасския земли прозябение,/ Святыя
Горы реко приснотекущая,/ учителю благочестия,/
обители Суротийския питателю,/ подвижающихся
добрый образе,/ Синая благое украшение,/ града
Коницы хранителю/ и всея Еллады пресветлое
солнце,/ юности попечителю и помощниче,/ человеце
Небесный и во плоти ангеле,/ целителю недужных и
страждущих упокоение,/ Паисие отче наш,/ Церкви
Христовы новая звезда и досточудная.

Стих: Честна пред Господом/ смерть преподобных
Его.

Радуйся, отче наш Паисие,/ отроком изрядный
благочестия проповедниче,/ страждущим скорое
избавление,/ безчинным кроткое вразумление,/
сущим в бедах подкрепление,/ скорбящим

утешение,/ верным вспоможение,/ всем,
приходящим к тебе помощниче,/ преподобных
сопричастниче/ и теплый о нас к Богу молитвенниче.

Стих: Блажен муж, бояйся Господа,/ в заповедех
Его восхощет зело.

Радуйся, преподобне отче Паисие,/ священников
богомудрый наставниче,/ благочестно жити хотящих
учителю,/ постником истинное правило/ и
богодохновенный провидче!/ Ты, дар прозрения
имея,/ сокрытая помышления ума обличал еси/ и
недуги душевныя врачевал еси./ Темже по всей земли
имя твое прославися/ и вернии со усердием молятся,/
твоя помощи взыскующе.

Слава, глас 8:

Постнически пожив и сласти житейския одолев,/
плоти желания и сладострастие всякое победил еси/ и
посещения благодатного сподобился еси,/ преподобне
старче Паисие,/ ты бо, в келлии своей пребывая,/
великомученицу Евфимию яве узрел еси/ и о
мученичестем подвиге ея беседовал еси./ С неюже о
нас молися,/ даровати душам нашим велию милость.

И ныне, Богородичен, глас тойже:

Владычице, прими молитвы раб Твоих/ и избави нас/ от всякия нужды и печали.

Тропарь, глас 1:

Фарасския земли порождение/ и Афона славное украшение,/ блаженне отче Паисие,/ преподобных изрядный подражателю,/ яко всесветлое солнце просиял еси/ и благодатию верных множества озарил еси:/ слава Давшему ти крепость,/ слава Венчавшему тя,/ слава Даровавшему тобою всем исцеления.

На утрени

По 1-м стихословии седален, глас 1.

Подобен: Гроб Твой, Спасе:

Благодатию Христовою просвещен, якоже древнии отцы с бессловесными зверьми пожил еси, отче богомудре, и птиц и змиев друг соделался еси. Темже вси, видевшии тя, ужасахуся и Вседержителя Бога прославляху.

Слава, и ныне, Богородичен, глас и подобен тойже:

Икону честную Страшнаго Предстательства Матере Владыки держал еси, преподобне отче Паисие, и, возрев к Вышним, явися ти от нея свет, озаряяй вся. Сего ради молися непрестанно с Приснодевою о душах наших.

По 2-м стихословии седален, глас 3.

Подобен: Красоте девства:

Многочуднаго честнаго Паисия, Горы Афонския славу и Каппадокийския земли прозябение, гордыню змиеву поправшаго, страсти плотския сокрушившаго и множества верных чудесы облагодетельствовавши достойно вси да почтим.

Слава, и ныне, Богородичен, глас и подобен тойже:

Приснодеву Госпожу Владычицу, земнородных род украсившую и сладчайший зрак имущую, в кущи Афонстей узрел еси, преподобне Паисие, и со умилением Той поклонился еси. Темже с Нею не закосни молиться о нас ко Господу.

Величание:

Ублажаем тя,/ преподобне отче Паисие,/ и чтим святую память твою,/ наставниче монахов/ и собеседниче Ангелов.

Псалом избранный: Терпя, потерпех Господа:

По полиелеи седален, глас 8.

Подобен: Премудрости:

Молитвами и подвиги твоими, отче Паисие, юным детоводитель и людем, страстию губительною одержимым, наставник был еси; имущим неудобоисцельныя обычаи греховныя преизрядный врач явился еси; взыскующим же пути спасения известный советник познался еси, подвижниче богопросвещенный. Темже вернии, в Суроти твоему гробу покланяющиеся, радуются и благочестно память твою по долгу воспевают.

Слава, и ныне, Богородичен, глас и подобен тойже:

Святой образ Твой, Дево, сущий в Сионе, узрев, божественный Паисий на горе Афонстей наказа иконописателем прилежно списати и велию Твою благодать всем проповеда. Сего ради, Богородице, не

оскудей непрестанно Христа молящи о всех рабах Твоих, воспевающих благочестно Пречистое Твое Рождество.

Степенна, 1-й антифон 4-го гласа. Прокимен, глас 4: Честна пред Господом/ смерть преподобных Его. Стих: Блажен муж, бояйся Господа, в заповедех Его восхощет зело. Всякое дыхание: Евангелие от Матфея, зачало 43.

По 50-м псалме стихира, глас 6:

Во всю землю изыде вещание подвиг твоих,/ преподобне Паисие,/ ты бо в двадесятем веце по Рождестве Спасове,/ яко звезда утренняя возсиял еси/ и православных множества просветил еси,/ во еже вести волю Господню./ Сего ради ныне, на Небеса возшед/ и стяжав велие дерзновение,/ молися о спасении душ наших.

Канон, глас 8.

Песнь 1

Ирмос: Колесницегонителя фараоня погрузи,/ чудотворяй иногда/ Моисейский жезл, крестообразно

*поразив/ и разделив море,/ Израиля же беглеца
пешеходца спасе,/ песнь Богови воспевающа.*

Даждь ми разум, Христе Всесильне, да возмогу
всеусердно воспети житие и многая чудеса
преподобного Твоего, Паисия честного и
многочудного.

Благочестно, яко ангел, на земли пожив, славне
Паисие, плоть и страстей востания духу покорил еси и
даров Божиих приятелище явился еси, всем
потребная подавая.

Всея твари Создателя теплою мольбою
умилостивляя, скорый помощник страждущим и в
скорби сущим явился еси, святе Паисие, святыя Горы
похвало.

Богородичен: В пучине страстей погружаемь,
утопаю, Мати Богородице, темже, яко нищий и
окаянный, взываю: молитвами Твоими бурю
искушений моих устави, Горы святыя Хранительнице.

Песнь 3

Ирмос: *Утверждей в начале небеса разумом,/ и
землю на водах основавый,/ на камени мя, Христе,*

заповедей Твоих утверди,/ яко несть свят паче Тебе,/ Еди́не Человеколю́бче.

Христовою благодатию победитель на духи лукавыя показался еси, отче Паисие, зело крепко смилив юношу Георгия, силою бесовскою одержима и обольщена бывша губительным учением.

Духоносный отче Паисие! Господь всяческих, красен добротою паче сынов человеческих, Свой Образ тебе некогда откры и исполни тя благодати велия.

Недоумет ум человеческий, како яве приял еси в твоей келлии многопетую великомученицу и дивную Евфимию, святе Паисие блаженне, отцев похвало.

Богородичен: Исцелений источник и врачевание изрядное Тя, Мати, вемы, удручаемии вси болезнями телесными. Темже с верою просим Твоея, Богоневесто, божественныя помощи.

Седален, глас 4.

Подобен: Скоро предвари:

Непрестанно в молитве пребывая, душу твою храм Духа Святаго соделал еси, Паисие преподобне, и

столп светел, верная просвещающий, явился еси, моля о всех Христа, Иже всех Содетеля и Вседержителя.

Слава, и ныне, Богородичен, глас и подобен тойже:

Дево Неискусомужная, христиан Упование и ангелов Веселие! Велие дерзновение пред Престолом Сына Твоего имущи, присно молися, Владычице, о чтущих Тя.

Песнь 4

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставль недра Отца,/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Силу с Небесе приемь, тяжкия болезни претерпевал еси, богомудре Паисие, и славословная пения усердно ко Христу возглашал еси. Темже и дар исцеления душ и телес приял еси.

Учению святых отец твердо следуя, мужественно в Солуни Христа исповедал еси, всеблаженне, и, яко ангел, с прочими иноки в путь богоразумный шествовал еси, образ веры подая человеком.

Руце твои преподобней ко Господу воздевая,
земли отступал еси, всехвальне Паисие, и свет
невещественный множицею лице твое осеняше.
Темже и зрящий в сиянии лик твой зело удивляхуся.

Богородичен: Во утробу Твою Вседержитель
вселися, Богородице, и человеков смешение от тли
обнови, клятву же разрешив и смерть упразднив,
темнозрачного противника беззаконного гордыню
смири до конца.

Песнь 5

Ирмос: *Вскую мя отринул еси/ от лица Твоего,
Свете Незаходимый,/ и покрыла мя есть чуждая
тьма окаяннаго,/ но обрати мя и к свету заповедей
Твоих/ пути моя направи, молюся.*

Духом деяния приходящих к тебе прозревая и
попечение милостивное показуя, вся потребная ко
спасению им подавал еси, богоносе отче Паисие.

Кроток и нестяжателен, молитвы делатель
прилежный, тишины любитель и любви рачитель, Бога
усердный почитатель и человеком милостивый
предстатель явился еси, богомудре Паисие.

Суесловия, зело верныя соблазняющая, наставленьми и ученьми православными, знаменьми и чудесы сокрушил еси, всеблаженне отче Паисие.

Богородичен: Ева убо прамати клятву рода древле прият, Ты же, Богородице, радость и мир Рождеством Твоим всем принесла еси. Темже Предстательницу человеком Твои раби Тя имамы, Владычице.

Песнь 6

Ирмос: *Очисти мя, Спасе,/ многа бо беззакония моя,/ и из глубины зол возведи, молюся,/ к Тебе бо возопих, и услыши мя,/ Боже, спасения моего.*

Целомудренно на земли пожив, верных души словесы твоими богато напитай еси, преподобне отче Паисие, и образ благочестия и чистаго жития всем явил еси.

Яко живительный источник, струи воздержания изливая, множество юных напоил еси, Паисие преподобне, и сих от блуда и нечистоты к потоку благодати привел еси.

Православия догматы множицею в житии твоём богомудренно и умодержавно яве утверждал еси,

Паисие преподобне, Святые Горы богоносный учителю.

Богородичен: Не имам дара слезного, еже плакати грехов моих множество, ни умиления, ни стенания спасительного, Мати, обаче мольбами Твоими ко Христу, лютое неводержание мое сокруши.

Кондак, глас 8.

Подобен: Взбранной Воеводе:

Святые Горы подвижника преславного/ и Церкви молитвенника теплаго/ восхвалим в песнях всеусердно,/ верные к жизни изрядней наставляющая/ и всякая прошения сих исполняющая,/ и тако ему возопиим:/ радуйся, отче Паисие.

Икос:

Яко ангел в последняя времена на Горе Афонстей явился еси, преподобне Паисие, на земли бо благочестне пожив, подвижников древних равностоятель показался еси. Темже с любовью вопием ти таковая:

Радуйся, Каппадокии божественное рождение;
радуйся, Афона велие богатство.

Радуйся, Коницы богодухновенная похвало;
радуйся, киновии Суротийския украшение.

Радуйся, реко многоструйная божественных
дарований;

радуйся, поточе неистощимый спасительных
врачеваний.

Радуйся, яко прославляеши обители Афонския;
радуйся, яко обитаеши на горе Синайстей.

Радуйся, многих благодатных даров приемниче;
радуйся, о людских невежествиих печальниче.

Радуйся, избавителю люте страждущих;
радуйся, провидче помышлений сокровенных.

Радуйся, отче Паисие.

Песнь 7

Ирмос: *Божия снисхождения/ огонь устыдися в
Вавилоне иногда./ Сего ради отроцы в печи,
радованною ногою,/ яко во цветнице, ликующе,
пояху:/ благословен еси, Боже отец наших.*

Научал еси изрядно наставленьми юных сословие,
еже супружество избрати или тесный путь иноческий

предпочести. Темже онии с тобою вопияху, поюще: благословен Бог отец наших.

Недуги телесныя терпеливно подъем, в сладость тяжкия болезни вменил еси, преподобне отче Паисие, темже и приял еси от Бога благодать независтную, чудодейственне страсти многоразличныя исцеляти.

Веселится обитель девическая, яже в Суроти, имущи, яко сокровище даров Святаго Духа, мощи твоя, блаженне Паисие, и Вседержителю восклицает: благословен Бог отец наших.

Богородичен: Струями чудес Твоих, Пренепорочная Владычице, земнородных чини от прелести велиара, скорбей, многоразличных бед и болезней телесных, Пречистая, свободждаются.

Песнь 8

Ирмос: *Седмерицею пещь/ халдейский мучитель/
Богочестивым неистовно разжже,/ силою же лучшею
спасены, сия видево, / Творцу и Избавителю вопияше:/
отроцы, благословите, / священницы, воспойте,/
людие, превозносите во вся веки.*

Собрания верных на Святей Горе к тебе, отче, усердно притекаху, прияти твою, преподобне, благодать и силу: ты бо от Бога многая дарования стяжал еси и во времена сия мудрый наставник человеком показался еси.

Познавшии, преподобне, жития твоего изряднейшая на горе Афонстей и во инех странах, воспевают Господа Человеколюбца: ты бо словесы и дела, яко звезда, возсиял еси и тьму человеком страждущим разгнал еси.

Всенощными твоими стоянии и многими посты образ изрядна подвижника на Горе Святей и в Синаи явил еси, всеславне Паисие. Ты и ныне ко Христу за люди руце усердно воздеваеши, древним отцем равночестне.

Богородичен: Многими согрешеньми недугующии, житейскими попечении и душевными страстьми обдержимии, к Тебе, Нескверней и Нетленней Владычице, смиренно вопием: молитвами Твоими из рова прегрешений возведи нас.

Песнь 9

Ирмос: *Ужасеся о сем Небо,/ и земли удивишася концы,/ яко Бог явися человеком плотски,/ и чрево Твое бысть пространнейшее Небес./ Тем Тя, Богородицу,/ Ангелов и человек чиноначалия величают.*

От тины прегрешений избавлься, око твое душевное очистил еси и тем болезни человеков лютыя, душевныя и телесныя ясно зрел еси, блаженне Паисие, и всех, приходящих к тебе, на лучшая наставляял еси.

Яко древле отцы, тако и ты неуклонным путем Христов богоугодно шествовал еси, Паисие чудне, и равно с Тихоном и прочими спостники Афонскими образ святыни во дни наши явил еси.

Яко имеяй дерзновение в Вышних, сохрани молитвами твоими от вреда льстиваго, и злых жития находящих, и бури прегрешений благочестно чтущих память твою и радостно поющих тя, преподобне.

Богородичен: Неистовствующия прилоги лукаваго отжени державою Твоею, Богородице Дево, яко

родила еси чудно Христа, Победителя Славного, потребившаго гордыню древняго змия и главу того сокрушившаго.

Светилен:

Преподобнаго Паисия, Горы Святыя славу, Суротийския обители хранителя, путевождя молящихся и юных наставника в пении почтим, славословяще божественне житие того и деяния.

Слава, и ныне, Богородичен:

Дево Преславная, христиан утверждение, благоговейное предстательство немощным человеком, болящим исцеление и страждущим крепосте, вселенная покрове! Благодосто Ты воспеваем, раби Твои.

На хвалитех стихиры, глас 8.

Подобен: Что вас наречем:

Отче преподобне Паисие!/ Фараския веси благое прозябение,/ Коницы многоценное сокровище,/ Суротийския обители похвало и радование,/ Горы Синайския подвижниче,/ Афона величайшее

украшение,/ теплый о нас молитвенниче,/ моли
спастися душам нашим.

Отче всеблаженне Паисие!/ Древних
подвижников подобниче,/ добродетелей
смирennemудрый исполнителю,/ монахов предивный
наставниче,/ юных мудрый учителю,/ болящих
известный целителю,/ демонов и нечаемых зол
прогонителю,/ моли спастися душам нашим.

Отче досточудне Паисие!/ Бедствующим теплый
предстателю,/ молящихся скорый услышателю,/
связуемых страстию наркомании избавителю,/
благодати Духа Святаго сосуде избранный,/ ангелов
собеседниче и преподобных сожителю,/ Царствия
Небеснаго наследниче,/ моли спастися душам нашим.

Отче богоносе Паисие,/ о всех, верую тя
воспевающих,/ не оскудей тепле молитися,/ стяжал
бо еси дерзновение ко Господу/ и многими дарованиями
от Него обогатился еси,/ прорицати будущая, яко
настоящая,/ исцеления подавати душевная и
телесная/ и к Царствию Небесному верныя
путеводити.

Слава, глас тойже:

Преподобне старче Паисие,/ во всю землю изыде
глас наставлений твоих,/ ты бо, яко ангел во плоти
пожив,/ живоносная евангельская словеса возвещал
еси/ и, образ терпения верным показуя,/ совершенно
на Бога уповати научал еси./ Мы же, ведуще тя
наставника мудра/ и ходатая пред Богом тепла/ с
верою и любовью вопием ти:/ моли спастися душам
нашим.

И ныне, Богородичен:

Небесная поют Тя,/ Обрадованная, Мати
Безвестная,/ и мы славословим неизследованное
Твое Рождество,/ Богородице, моли спастися душам
нашим.

На Литургии

служба вся преподобническая

Текст службы утвержден на заседании
Священного Синода 8 декабря 2020 года (журнал
№ 99)

